

## Pitanja i odgovori iz pete sedmice (2 – 8. mart 2026) objave Poziva za dostavljanje projektnih prijedloga u okviru EU4CAET – Instrumenta za dodjelu grantova – Finansijski aspekt - Poziv br. 1 (EU4CAET Poziv)

### Pitanje 1.

Da li će za projekte kojima budu dodijeljena bespovratna sredstva biti osigurana i tehnička asistencija tokom ugovaranja i implementacije, i šta će ona obuhvatati?

### Odgovor 1.

Pored finansijske podrške, GIZ će za projekte kojima budu dodijeljena bespovratna sredstva osigurati i tehničku asistenciju tokom ugovaranja i implementacije, s ciljem podrške kvalitetnoj, pravovremenoj i uspješnoj realizaciji investicija. Tehnička asistencija obuhvata podršku u izradi tenderske dokumentacije, pripremi i provođenju postupaka javne nabavke, ugovaranju, kao i praćenju izvođenja radova, uključujući stručni nadzor.

### Pitanje 2.

U općini iz FBiH još uvijek nije uspostavljena nijedna energetska/obnovljiva energetska zajednica. Kao građanin sam pri kraju realizacije fotonaponske elektrane za vlastite potrebe (prosumer), koju sam finansirao vlastitim sredstvima. U EU4CAET Pozivu sam vidio mogućnost dodjele podsticajnih sredstava, pa Vas molim da mi pojasnite da li i na koji način mogu aplicirati. Također, eventualno odobrena sredstva bih iskoristio za nabavku toplotne pumpe.

### Odgovor 2.

U okviru EU4CAET Poziva fizička lica (pojedinci/građani) ne mogu samostalno podnijeti projektni prijedlog, niti je moguće aplicirati za podršku za projekte koji su namijenjeni isključivo individualnim domaćinstvima. U skladu s uslovima EU4CAET Poziva, prihvatljivi podnosioci projektnih prijedloga su općine i gradovi, Zajednice obnovljive energije (osnovane ili u procesu osnivanja), kao i partnerstva koja uključuju općinu ili grad. Građani mogu učestvovati isključivo kao članovi ili partneri u okviru takvih struktura, pod uslovom da projekat ima jasno definiran zajednički karakter i ispunjava sve ostale uslove EU4CAET Poziva.



### Pitanje 3.

Planiramo da osnujemo Zajednicu obnovljive energije (ZOE) i zainteresovani smo za realizaciju Projekta izgradnje fotonaponske elektrane. Objekat na kojem planiramo izgraditi elektranu je u vlasništvu jednog od osnivača ZOE. Interesuje nas da li je moguće aplicirati na Javni poziv EU4CAET, ako je taj objekat pod hipotekom naredne 4 godine? Dodatne informacije:

- Vlasnik objekta je pravno lice tj. javna institucija;
- Podnosilac prijave bi bila opština;
- Planirana fotonaponska elektrana gradi se na javnom objektu i namjena proizvodnje je za potrebe članova ZOE;
- Posjedujemo raspoloživu dokumentaciju koja potvrđuje: vlasništvo nad objektom (zemljišnoknjižni izvadak), trenutno bez opterećenja u ZK, jer je hipoteka tek u planu.

Nas interesuje da li bi stavljanje ovog objekta pod hipoteku, na kojem planiramo fotonaponsku elektranu, uticalo na učešće u ovom projektu?

### Odgovor 3.

Da, moguće je podnijeti prijedlog projekta u okviru EU4CAET Poziva i u slučaju kada je objekat planiran za stavljanje pod hipoteku, pod uslovom da su ispunjeni svi ostali zahtjevi EU4CAET Poziva. Međutim, aplikant je dužan osigurati i jasno dokazati da se krov/objekat može koristiti za izgradnju fotonaponske elektrane tokom cijelog perioda relevantnog za implementaciju i korištenje investicije, te da je korištenje krova formalno omogućeno Zajednici obnovljive energije (ZOE) (odnosno da ZOE ima jasno definisano i dokazivo pravo korištenja krova za potrebe izgradnje i rada FN sistema).

Drugim riječima, hipoteka sama po sebi ne isključuje prijavu, ali je ključno da ne postoji pravna ili ugovorna prepreka koja bi mogla ograničiti ili onemogućiti realizaciju i korištenje FN sistema od strane ZOE, nakon dodjele granta.

### Pitanje 4.

Molim Vas za pojašnjenje sljedeće formulacije iz EU4CAET Poziva: „do 170.000 EUR za projekte razvijene uz podršku Jedinice za tehničku pomoć Instrumenta za dodjelu grantova“. Šta se tačno podrazumijeva pod Jedinicom za tehničku pomoć (TAU) i pri kojoj instituciji ona djeluje?

### Odgovor 4.

Jedinica za tehničku pomoć je mehanizam podrške u okviru EU4CAET Instrumenta za dodjelu grantova, čija je uloga da pruži ciljanu, na zahtjev zasnovanu tehničku podršku vlasnicima projekata radi jačanja njihovih kapaciteta za pripremu i provedbu projekata u





skladu s tehničkim, regulatornim i finansijskim zahtjevima, te radi unapređenja ukupnog kvaliteta i uticaja finansiranih projekata. Jedinica za tehničku pomoć ima ključnu ulogu u razvoju i podršci novih ili manje iskusnih vlasnika projekata, uključujući novoosnovane zajednice obnovljive energije. Tehnička podrška se može pružati kroz više faza projektnog ciklusa, uključujući podršku u razvoju projektne ideje, izradi koncepta implementacije (npr. studija izvodljivosti/poslovni plan), pripremi tehničkog dizajna i dokumentacije, snalaženju u režimu dozvola, te pripremi i provedbi nabavki i realizacije (za projekte koji dobiju grant).

Jedinicu za tehničku pomoć u potpunosti operativno vodi GIZ, kroz angažman vlastitog osoblja i odabranih eksternih eksperata.



EU4CAET is co-funded by the European Union and the Federal Republic of Germany. GIZ has been commissioned to implement it as part of the CAET programme by the German Federal Ministry for Economic Cooperation and Development. The project supports Bosnia and Herzegovina's energy transition by providing expertise and grant funds for community-led sustainable energy projects.